



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

32. Kalenderwoche – ab 06. August 2011

Drenngosd

Meine Gudste had gesachd, dass isch zu fedd bin. Ja, mei Bauchumfang däde eindeidisch ibor irschend so eim Indeggs lieschn. Ab ibor een Medor Umfang is e Bauch ganz sähr ungesund, däde de Wissensschafd sachn.

Nu, kennde isch endgeeschn haldn, dass e Bauch erschd e Bauch is, wennor ibor een Medor im Umfang hamm dud, un vorhähr besdnfalls eene kleene Körborunwuchd is. Unnor eim Medor Umfang - da dud ja erschdema das Bauchgnebbel die Schdelle margiern, wo dor Bauch hingehern dud! So gesähn hamm mansche Leide gahr keen Bauch in dor Hose!

Un isch kennde ooch sachn, dass e Mann im besdn Aldor eenfach een Bauch hamm muss! E Mann ohne Bauch is e Kribbl, sachd ja ooch dor Volgsmund.

So kennde isch sachn, abor isch bin ja nu e Mänsch, dähr sähr viel von dor Wissensschafd haldn dud. Nee, isch due de Wissensschafd nisch ignoriern. In alle Bereische - un ähm ooch im Bereisch von dor Ernährung un so. Un de Ernährungswissenschafd dud ja dann in de Gesundheitswissenschafd iborgehn. Fließend sozusaachn. Nascha, un de Gesundheitswissenschafd darf mor, wennsde nisch vorzeidisch dähn Leffl abgähm willsd, werglisch nisch ignoriern. Un wenn dor Volgsmund noch so dageeschn redn dud! Nee, dor Volgsmund dud nisch immor Reschd hamm. Dähr dud ja ooch sachn: Liebor een Bauch, als wie gahr keene Figuhr!

Jednfalls bin isch dor Wissensschafd geeschnibor sähr offn un durschdisch. Ja, isch bin sozusachn sähr wissensdurschdisch! Un daderdrum habbsch mir also de Worde von meinor Gudstn zu Härzn

genomm, vonweeschn dass isch zu fedd sein däde, un habb beschlossn, meim bersehnlichn Bauch dähn Kambf anzusaachn. Dähr hadd seinorseids erschdema sähr gelassn reagierd. Dähr dud nisch gloom, dass isch dähn Kambf gewinn kann. Isch ja eischendlich ooch nisch. Alleene, wenn isch an mei Ahmdbierschn denkn du! E Ahmdbier is ja nu nisch off eene Flasche begränzd. Das Ahmbier had ja eene nach ohm offne Gränze. Je nachdähm, wie lange dor Fernsähor loofn dud.

Abor ooch wensch an Haggebedor odor an Schweinebradn mid Gleeße denkn du... Dähn Kambf geeschn dähn Bauch mussde nähmlisch haubdsäschlich mid Grienzeusch fiehrn. Gemiese un Sallad un Vollgornbrod... sowas kannsde in raue Meng vordriggn! Abor alles was gud schmeggn dud, darfsde nisch. Das dud sisich dann Drenngosd nenn.

Wobei - du derfdesd bei Drenngosd ooch Fleisch vorschbuln... sogahr ahmds, abor dann ehm ohne Gleeße un ooch ohne Brod. Un da duds mir ehm schon widdor nisch schmeggn. Nee, du musd bei Drenngosd genau drenn zwischn Zeisch, was dir schmeggn dud, un Zeisch, was dir nisch schmeggn dud. An das was dir nisch schmeggn dud, das darfsde essn. Na, isch bin sähr geschbannd, wie das bei mir nu jedzde ausgehn dud - sieschd mei Geschmagg odor dor Iborlähbenswille?

Eduard Sachsenmeyer